

Ymgynghoriad statudol ar ddarpariaeth Ysgol AAA yn Meirionnydd a Dwyfor i'r dyfodol

Yn ei gyfarfod ar 9 Hydref 2012, cytunodd Cabinet y Cyngor ar y 'Cynllun Blaenoriaethau – Maes Trefniadaeth Addysg' oedd yn cynnwys bwriad y Cyngor i addasu ei ddarpariaeth Anghenion Addysgol Arbennig.

Yn yr adroddiad nodwyd fod y Cyngor eisiau 'diwygio ei ddarpariaeth Addysg Arbennig oherwydd bod y ddarpariaeth bresennol yn Ysgol Hafod Lon dros ei chapsiti ac angen ei moderneiddio a'i hymestyn.'

Hefyd, nodwyd fod 'darpariaeth briodol ac addas ar gyfer rhan ogleddol y sir yn Ysgol Pendalar, Caernarfon, a bydd y datblygiad yma yn anelu i sicrhau darpariaeth debyg, mewn man canolog, ar gyfer gweddill y sir. Nid yw'r ddarpariaeth bresennol wedi ei lleoli'n ganolog ar gyfer yr ardal mae'n ei gwasanaethu, ac nid yw'r cyfleusterau chwaith yn cwrdd ag anghenion addysgol modern.'

Yn dilyn cynnal cyfres o gyfarfodydd Gweithgor i asesu opsiynau posibl i ymateb i anghenion y ddarpariaeth, a cyfres o gyfarfodydd ymgysylltu gyda staff, rhieni a cyrff llywodraethol perthnasol, cyflwynodd Aelod Cabinet Addysg Cyngor Gwynedd, y Cynghorydd Gareth Thomas, adroddiad i Gabinet ar 10fed Mehefin 2014, gyda ei argymhellion ar gyfer dyfodol Addysg Anghenion Arbennig ym Meirionnydd a Dwyfor a'r bwriad i gynnal ymgynghoriad statudol ar yr opsiwn ffafredig, sef i:

Ymgymeryd a phroses ymgynghori statudol yn unol â gofynion Deddf Safonau a Fframwaith Ysgolion (Cymru) 2013 i ail-leoli Ysgol Hafod Lon ac Uned Tŷ Aran i safle newydd ym Mhenrhyndeudraeth ar 1 Medi 2016, cynyddu capasiti yr ysgol ac ychwanegu elfen breswyl i'r ddarpariaeth.

Mi fydda'r opsiwn yma'n golygu y byddwn yn:

- a) Datblygu ysgol newydd mewn lleoliad canolog i blant sy'n byw yn ardaloedd Meirionnydd a Dwyfor yng Ngwynedd. Y nod yw agor y ddarpariaeth newydd ym Mhenrhyndeudraeth fydd yn golygu y bydd yn rhaid i blant AAA o Feirionnydd a Dwyfor deithio pellteroedd tebyg i dderbyn eu haddysg.
- b) Cynyddu llefydd ysgol AAA ym Meirionnydd a Dwyfor i gynnig darpariaeth i hyd at 100 o blant yn cynnwys y rhai hynny gydag anghenion addysgol arbennig mwy cymhleth a dwys, gan gynnwys awtistiaeth.
- c) Datblygu ysgol fydd yn cyrraedd safon Ysgolion yr 21ain Ganrif, y safon cwricwlwm uchaf, gyda adnoddau therapiwtig ac adnoddau amgen sy'n diwallu anghenion plant sydd ag anghenion addysgol arbennig mwy cymhleth a dwys, gan gynnwys awtistiaeth.
- d) Datblygu ysgol sydd â'r adnoddau angenrheidiol megis pwll hydrotherapi, ystafelloedd synhwyrdd, ystafelloedd therapi adlamu arbenigol (*rebound therapy*), amgylchoedd dysgu allanol therapiwtig, cyfleusterau garddwriaethol a busnesau bychain i wireddu'r model a ffafirir.
- e) Darparu cyfleuster 6 gwely preswyl / egwyl fer i blant a phobl ifanc gydag AAA yng Ngwynedd, ac i Awdurdodau Lleol eraill o bosib.
- f) Datblygu cyfleuster fydd yn gwasanaethu fel canolfan i ddarparu gofod gweithio proffesiynol i weithwyr allweddol ymgysylltu'n llawn gyda rhieni, staff dysgu arbenigol a staff cefnogol yn rheolaidd.
- g) Parhau a'r ddarpariaeth bresennol yn Nhŷ Meirion fydd yn caniatáu mynediad i addysg uwchradd priflif i'r plant hynny fyddai'n ei chael yn anodd i deithio i'r ysgol newydd o dde'r sir

Penderfynodd y Cabinet i gymeradwyo'r argymhellion i gynnal ymgynghoriad statudol.

Ymgynghori Statudol

Mi fydd yr ymgynghoriad statudol yn cael ei gynnal rhwng 23 Mehefin a 5 Awst 2014.

Mae'r cyfarfodydd canlynol wedi eu trefnu fel rhan o'r ymgynghoriad:

Ysgol Hafod Lon - staff	23/06/14 - 16:00
Ysgol Hafod Lon - llywodraethwyr	23/06/14 – 17:00
Uned Ty Aran - staff	26/06/14 - 16:00
Diwrnod agored	Agored i holl rieni ac unrhyw unigolion neu sefydliadau ac asiantaethau sy'n dymuno mynychu
Pwllheli – Canolfan Hamdden Dwyfor	07/07/14: 14:00 – 19:00
Dolgellau – Canolfan Hamdden Glan Wnion	08/07/14: 14:00 – 19:00
Penrhyndeudraeth – Neuadd Goffa	09/07/14: 14:00 – 19:00

Mae trefniadau hefyd wedi eu gwneud ar gyfer darganfod sylwadau plant sy'n mynychu Ysgol Hafod Lon ac Uned Ty Aran.

Gallwch weld y ddogfen ymgynghori a gwybodaeth gefndirol ar wefan Cyngor Gwynedd drwy ddilyn y linc isod:

www.gwynedd.gov.uk/trefniadaethysgolion, ac yna clicio tab 'Ysgolion yr unfed ganrif ar hugain' (ar y chwith) ac yna clicio tab 'Ysgol Arbennig Meirion Dwyfor' (eto ar y chwith).

Gallwch hefyd weld copïau caled yn Ysgol Hafod Lon ac Uned Ty Aran, Ysgol Gynradd Dolgellau, llyfrgelloedd Dolgellau, Pwllheli, Penrhyndeudraeth, Porthmadog, Blaenau Ffestiniog, Y Bala, Tywyn a swyddfeydd Cyngor Gwynedd yn Dolgellau, Pwllheli a Caernarfon.

Os ydych eisiau copïau caled mae croeso i chi gysylltu â ni drwy ffonio (01286) 679648 neu e-bostio ysgolarbennigmeiriondwyfor@gwynedd.gov.uk

Yn dilyn y cyfnod o ymgynghori statudol bydd adroddiad pellach yn cael ei gyflwyno i Cabinet y Cyngor, yn manylu ar ganlyniadau'r ymgynghoriad hwnnw. Bydd yn rhaid i'r Cabinet ystyried yr ymgynghoriad ac unrhyw sylwadau sy'n deillio ohono.

Yn ddibynol ar argymhelliad gan y Cabinet, bydd angen penderfynu p'un a oes angen cyhoeddi Rhybudd Statudol i weithredu'r cynnig. Pe bai Rhybudd Statudol yn cael ei gyhoeddi, caniateir cyfnod o 28 diwrnod i gyflwyno unrhyw wrthwynebiadau.

Yn dilyn hyn mi fydd adroddiad yn cael ei gyflwyno i weithrediaeth y Cyngor er penderfyniad terfynol.

NODER - pwrpas cyfnod ymgynghori statudol ydi casglu sylwadau a barn pobl ar y cynnig a mi fydd angen i unrhyw un sydd eisiau gwrthwynebu'n ffurfiol i'r argymhelliad gyflwyno gwrthwynebiadau ysgrifenedig yn ystod cyfnod rhybudd statudol sy'n gam ar wahân i'r cyfnod ymgynghori statudol.